

È reinvie !

Vôs saites tus qu' l' hèrbâ, les pammes tchoéyant des pammies ch' lai tiere. C'ment ci Newton qu' é saivu graiy'naie lai réye d' lai tchoite des coûes, vôs craites craibîn qu' les pammes tchoéyant tot drèt ! È bîn, è n' en ât ran. Ìn âtre sciençou é môtrè ìn pô pus taîd, qu' les coûes tchoéyant de chrégue ! Ç' ât ç' qu' an aippele lai reinvie vés l' Ècht. (la déviation vers l'Est). Tiaind qu' mon raicodjaire de l' Uni m' eut aippris çoli pe m' eut môtrè l' ìmpoétchaince de ç'te réye, i m' seus dit qu' Dûe, le grôs r'leudgeou di monde qu' l' é v'lu dînche saivait ç' qu' è fsait, è qu' nôs l' poéyîns r'mèchiaie ! I m' seus musè âchi en ç' que m' diait mon grant-père : « Ç' que vait de chrégue n' vait p' daidroit ! È fât être ìn tot foûe l' ôvrie, po faire âtche de reinvie qu' aiveuche di djèt ! ».

Vôs n' èz p' fâte de djâbiaie bîn grant, po voûere qu' chutot adj'd'heû, l' ordieu bousse l' hanne è faire tot ç' qu' yi pèse poi lai tête, sains piepe aivoi tieûsain d' l' hértaince des réyes de vétçhaince qu' aint léchie ces qu' aint vétçhu d'vaint lu. I me n' veus p' aittairdgie li-d'tchus, è n' y é p' prou d' piaice dains ci p'tét biat.

Mon grant-père me diait âchi : « Tote vartè n' ât p' boinne è dire, mains è y é des côps qu' è fât aivoi l' coéraidge d' lai dire ! ».

Dâli, i ainm'rôs r'veni chus lai mochion (motion) d' ci député Hubert Ackermann. È s' aidgéchait d' léchie les patois noms des v'laidges d' note Jura â long d' nôs vies. Vôs coégnâtes lai cheûte, les feuyes di Jura en aint pailè.

Di fond di tiûere, i r'mèchie ç't' Hubert po sai mochion è pe les députès (quâsi lai moitié di Pairlement), qu' sont aivu d'aiccoûe d'aivô lée. I réchpècte bîn chur l' aivis des âtres, meinme ch' yote déchijion feut ènne déchijion è reinvie di djèt! En se n' musaint ran qu' en lai réye (la loi) d' lai Suisse chus l' traifitche des vies (Q.J. du 24 janvier 2002) pe en rébiaint lai réye (article 42, alinéa 2) d' lai Conchtituchion di Jura ch' le sôtîn â patois, ìn (obîn des) Menichtre(s) è pe des députès aint fait ç' qu' an peut aipp'laie âtche de chrégue.

I yôs raippele tot simpvement qu' lai moiyou façon d' faire tiaind qu' an ont fait âtche qu' n' ât p' daidroit, ç' ât d' le r'coégnâtre è pe de r'tacoénaie l' aiccreu. Ènne tâ démaîrtche les garantirait !

Patoisaints, aigongies d' yutie po sâvaie vote patois ! È n' ât p' moûe, èl ât édgealè c'ment lai naiture en huvie. Èl aittend l' tchâd d' vôs tiûeres po r'pâre le d'tchus, po r'çhoéri d' totes ses tieulèes dains note càre de tiere, po embâmaie d' sai sentou lai vétçhaince d' note jurassienne djûenence de d'main !

J-M. Moine